

Div'NU VÎ

Div'nu vî, c'est chûre one chavéye
Dispû dès-ans èt dès razans.
On côp qu'on-z-a passé l' mitan
Li bride ni pout pus yèsse toûrnéye.

Div'nu vî, c'est r'mète one paletéye
Su li p'tit feu qu'è-st-alumé,
Qui djômîye, qui n' saureut brûler
Qu'ossi longtimps qu'on-z-ègzistéye.

Li djon.nèsse coûrt après l' cârote
Qui l' vîye lî présinte pad'avant s' nez.
Mins l' bèle cârote, po l'atraper
Faut passer cint-z-èpreûves di rote.

Avou lès-ans, gn-a tot qui candje :
Gamin, tofêr, avou m' pârin,
Dj'anteûve dès brâvès vîyès djins
Qui m' miloutin.n' come on p'tit andje.

Au djoû d'audjoûrdu, s'i vos chone
Qui l'èfant qu'èst là èt qui braît,
Vos v'loz sawè ç' qu'on lî a faît,
C'èst tot d' chûte on mwaîs nom qu'on v' done.

Div'nu vî, c'est sayî d' comprinde
Poqwè ç' qu'asteûre, dins lès culots,
Totes lès sov'nances, tos lès bias spots
Daus vîs, on n' lès vout pus ètinde.

One vikériye plin.ne d'èspériyince,
Douvint ç' qu'on n' faît qu' de l' cobourer
Come one qui n' freut pus qui d' jin.ner ?
N'èst ç' nin pus fiyauve qui totes vos syinces ?

Div'nu vî, c'est todi yèsse près',
Come Brassens* l'aveut d'dja tchanté :
Pruster d' bon keûr, èt minme doner
Sins balziner, au pus p'tit jèsse.

Pace qui, tot spaurdant do bouneûr,
Mi, ça m'apwate dèl djôye èto !
Si vos jujez di m' toûrner l' dos,
Ça n' mi mètrè nin d' mwaîje umeûr. »

Là qu' ça t' rivint, l'istwêre di l'aube,
On bia gayî qu' t'aveus planté :
Quarante ans, qu'i t'a faît droguer !
Tot l' timps d' lèyî crèche one rude baube.

Cite anéye ci, al Sint Lambêrt,
Dès gayes, gn-a yeû à tchîr dissus.
T'as fait ti d'vwêr, tè l's-as choyu
Pusqui l' Sint lès vout veûy al tête.

On lès ramasse, èt là qu'on tûze :
- Il èst bin tims di s' pawiner
Tot s' vantant : « - Don, qu'i-gn-a po fé ! »,
Tot rovient qu'on s'a d'né tant d' rûses.

Maugré s' mau d' rins, là qu'on s' rastampe :
« - Ti freus branmint mia di t' djoker !
Sés' bin qu' tos mès dints ont bagueé
Po l' payis qu'on n'a pupont d' crampes ! »

Div'nu vî ! S'on pôreut prétinde
Qui tot ç' qu'aveut stî fait d'avant nos,
On l'a rabèli po tortos,
Nos-èfants n'aurint nin à s' plinde.

Portant, i n' faut nin qu' ça n's-èspêche
Di prinde li vîye do bon costé !
Tant qu'on-z-è pout co profiter !
Divant qui l' vatche ni vègne à sètch !

En m' lèvant, dj'èdaume one djoûrnéye ;
Èlle èst fine noûve ! I va fé bia !
I pôreut co tchaîr dès gruzias,
Vos n' sauroz bate conte mès-idéyes.

Di djon.ne à vî, c'èst l' tims qui passe !
Mins dins nosse tièsse, dins nosse cèrvia,
Gn-a nuk, quand ç' sèreut co l' boûria,
D' capâbe di maîstri à nosse place.

Li pwèd dès-ans done dèl valeûr :
One tièsse di tchènu, c'èst d' l'ârdjint.
Lès vîs catchenut au pus sovint
Dins leû bouche tot l'ôr qu'i l'zî d'meûre.

Èsconte dès vîs rins, c'èst dès pîres,
One saqwè d' râtre qu'on n' trove qui là.
Dès pîds, div'nus pèsants au-d'la,
Dès s'mèles di plomb ! Dji v' veu sorîre !

Lès vîs d'vègnenut todi pus ritches,
I sont su one saqwè d' novia :
Do gaz naturél qu'on lome ça !
Qui nè l'zî costéye nin one tchitche.

Vos-admètroz tot l' minme qu'asteûre,
I sèreut tims d'uker lès vîs
Po l'zî d'mander d'mwinrner l' pays,
Èt nosse vîye bole, li r'mète à l'eûre.

Albert DELVAUX.

Chavéye : chemin encaissé.
Toûrner l' bride : faire demi-tour, rajeunir.
Passer d's-èpreûves : surmonter des obstacles.
* « Trompettes de la renommée »
Droguer : attendre en vain.
Si pawiner : se pavaner.
Li pays qu'on n'a pupont d' crampes : l'au-delà.
Vinu à sètch : tarir, épuiser.
Boûria : bourreau.

www.ecoledewallon.be